

## SPEECH ON THE CORONA VIRUS

23 March, 2020

Oute fa'atalofa atu i Paia Maualuluga o Samoa i ona tulaga fa'alupe. O paia fa'ale tala lelei ma mamalu fa'ale atunu'u e fa'amalulu atu o le a le auili'ilia i sa'u fa'amatalaga. Aua o Paia ma Mamalu o Samoa e mai le vavau ma e o'o atu lava i le fa'avavau.

Ae avea ia lenei avanoa e fai ai a'u ma fofoga tau momoli o le Afioga i le Ali'i Palemia ma le Kapeneta, oute toe fa'ailoa atu ai tapenaga ma fuafuaga fa'ata'atitia a si o tatou Malo ina ia fa'afoia ma fa'aiti'itia ai ni a'afiaga o si o tatou Atunu'u mai le fa'ama'i mata'utia o le Corona Virus.

I lana Fonotaga fa'apitoa i le Aso To'ona'i na te'a nei, aso 21 o Mati 2020, sa fa'amaonia ai e le Kapeneta e fa'apea:

1. Le faia o le Fa'aaliga Fa'asalalau o Fa'alavelave Tutupu Fa'afuase'i (State of Emergency) e uiga i le pipisi o le fa'ama'i o le corona virus (KOVITI-19), e tusa ai ma aiaiga o le Faavae o le Malo Tuto'atasi o Samoa (Constitution of Samoa);
2. Le amatalia o le vaiaso o Anapogi ma Tatalo i Aiga uma o Samoa, amata mai i le Aso Sa 22 o Mati 2020 e o'o atu i le Aso To'onai 29 o Mati, mai le itula e 6:00 i le taeao seia aulia le 12:00 i le aoauli;
3. Le toe fa'amalosia o le taofia o potopotoga fa'alaua'itele uma, e o'o atu i le 5 tagata e aofia ai pe sili atu fo'i (e aofia ai Tapua'iga, Maliu, Umusaga, Ta'aloga Faitupe, Aso Fanau, Reunion ma isi Potopotoga uma);

4. Le taofia o ta'alogā, ma fa'afiafiaga uma e ono tumutumu iai tagata;
5. Le tapunia o fale kalapu ma nofoaga faitete e pei o fale-tifaga ma falepia, e aofia ai ma Pa Pia i totonu o fale talimalo;
6. Le taofia ona toe taumamafa nisi i totonu o Falea'iga (eat in), ae fa'amalosia na o le oka ma piki mea taumafa (order and take away);
7. Le taofia o le tumutumu i nofoaga o femalagaiga e pei o malae va'alele ma uafu;
8. Le fa'aitiitia o faigā malaga o va'a a lalo i le tolu (3) aso o le vaiaso i le va o Upolu ma Savaii, ua nā o le Aso Sa, Aso Lulu ma le Aso Faraile;
9. Le fa'aiti'itia o le so'ona feoa'i, aemaise ai i latou ua 60 tausaga ma sili atu le matutua, se'i vagana ua mātuā mo'omia ona va'ai se fomai;
10. Le fa'atapula'a o itula e tatala ai Maketi i Savalalo, Fugalei, Salelologa ma Vaitele ma isi maketi mai le itula e 6:00 i le taeao ae tapunia i le 4:00 i le afiafi, ma e le toe fa'atagaina ona toe momoe ai nisi i nei nofoaga;

11. Le tapu ona toe aga'i i le Falema'i, sei vagana ua mo'omia ona vaai se foma'i. Ua faamalosia foi le tasi o le tausima'i e va'aia le gasegase, ma ia lē silia i le to'alua tagata mo asiga o gasegase;
12. Le taofia o pisinisi o lo'o fa'atino i tāfāala uma o le Taulaga, e aofia ai ma le fa'atau savali o oloa e tamaiti (street vendors);
13. Le fa'atinoina e le PSC (po'o le Komisi o Tagata Faigaluega) o ni tulaga talafeagai mo le Au Faigaluega a le Malo, e fa'aiti'itia ai le ono pipisi o le fa'ama'i e pei o le galulue mai i le fale e fa'aaoga ai le initaneti;
14. Le tapunia o A'oga uma i Samoa seia toe maua atu se isi fa'aaliga;
15. Le taofia o femalagaiga a pasi la'u pasese, ae fa'aaoga na o ta'avale laiti (taxis) e i lalo ifo o le 5 pasese ma ta'avale a aiga pe a mo'omia;
16. Le tapunia o femalagaiga fa'avaomalo, se'i vagana ai i latou e sitiseni ma nonofo i Samoa ma e tatau ona fai a latou siaki o le KOVITI-19, e fa'amaonia ai e lē o a'afia i le Vairasi i totonu o le lima (5) aso, a o le'i malaga atu mo Samoa;
17. Le taofia o malaga uma fa'ale-Malo mo atunu'u i fafo seia toe iai se isi fa'aaliga;

18. Le taofia o malaga uma ua fuafua mo galuega fa'avaitaimi i Niu Sila ma Ausetalia (e iai le RSE) seia toe iai se isi fa'aaliga;
19. Le taofia o le malaga ese atu o fanau sikolasipi ua tāpena mo a'oa'oga i fafo, seia toe maua atu se isi fa'aaliga;
20. Le fa'aitiitia o malaga a va'alele mai Aukilani i Niu Sila mo Samoa i le na o le tasi o le malaga i le vaiaso mo le tatou va'alele o le Samoa Airways ma le Air New Zealand;
21. Ua taofia malaga uma i le va o Samoa ma Ausetalia;
22. Le taofia o malaga uma i le va o Samoa ma Amerika Samoa seia toe iai se isi fa'aaliga;
23. Le taofia uma o malaga i le va o Samoa, Fiti ma Tonga seia toe iai se isi fa'aaliga;
24. Le fa'atinoina o malosiaga fa'apitoa a Ofisa Sili o Matagaluega ma Fa'alapotopotoga a le Malo, e fa'atino ai fuafuaga mamao a le Malo i le tali atu i le Corona Virus (po'o le KOVITI-19);
25. Le taofia ona toe auina atu i Niu Sila o gasegase mo togafitiga i lalo o le Polokalame o le Samoa Medical Treatment Scheme, seia toe iai se isi fa'aaliga;

26. Ua toe fa'atonuina fo'i le Matagaluega o le Soifua Maloloina ina ia saga fa'amalosia ma unaia polokalame fa'alauiloa o le puipuiga o le pipisi ai o le fa'ama'i, mo le nofo silafia o le Atunu'u;

27. Ua fa'atonuina le Matagaluega o Leoleo ina ia fa'atino le mata'ituina o nei fuafuaga uma;

Sa amata fa'amamaluina nei poloaiga mai i le itula e 12:00 (midnight) o le Aso Sa 22 o Mati 2020, ma e toe iloiloina i le lua (2) vaiaso o lumana'i;

E fia fa'iloa atu fo'i i le Mamalu o si o tatou Atunu'u o lo'o ala'ala ma papa'ao i Niusila nei, e o'o mai i le taimi nei e le'i iai seisi ua fa'amaonia ua a'afia i lenei fa'ama'i i totonu o si o tatou Atunu'u. O i latou e to'aono sa masalomia, ua fa'amaonia nei e le o a'afia, ma e fa'afetai ai pea le alofa o le Atua i si tatou Atunu'u.

Samoa e, e talitonu ua lava lo outou silafia mai i le mau apoapoa'iga o lo'o fa'asalalau atu pea i luga o le Leitio o le Laumua, TV ma Upega Tafa'ilagi auā lo outou puipuia mai lenei fa'ama'i mata'utia.

O nei fautuaga e aofia ai: le fufulu mama lea o lima i se fasimoli, taofia le lulu a'ao ma le fusi pe sogi atu fo'i i le isi tagata, ma fa'aiti'itia le malaga ese atu mai maota ma laoa. E toe fa'amantu atu lava, ua fa'alauiloaina mai o i latou ua tele ma tugā a'afiaga mai lenei fa'ama'i, o Tinā ma Tamā matutua ia e i luga atu o le 70 tausaga o latou soifua.

Ma, ina ia puipuia si o tatou Atunu'u mai a'afiaga tugā mai leni fa'ama'i, e fautuaina ai lava lo outou Paia ma Mamalu ina ia taofia le toe faimalaga atu mo si o tatou Atunu'u i le taimi nei. E tāua le lafo o seleni mo fa'alavelave, i lo le a'afia o soifua o ō tatou tagata mai le Vairusi tatou te ono malaga atu ma i tatou.

E toe talosaga atu ai lava ma le agaga maualalo, fa'amolemole, fa'autagia le tele o apopoaiga ma fautuaga ua tu'uina atu, e le gata mo le puipuia o lou lava Soifua a o le soifua o Alo ma Fanau aemaise ai lava Tinā ma Tamā matutua.

Ia fa'amanuia mai le Atua i lo outou Paia ma Mamalu, aemaise ai si o tatou Atunu'u Peleina o Samoa.

Mo nisi fa'amatalaga, fa'afeso'ota'i mai le tatou ofisa i le telefoni:

**(04) 472 0953 -- (04) 472 0953**

**SOIFUA MA IA MANUIA.**